

Vischnaunca politica Andiastr

Radunonza communal dils 16 d'avrel 2010

1. Beinvegni ed elecziun dil dumbravuschs

President communal Sievi Sgier fa in cordial beinvegni. Sco dumbravuschs vegnan Priska Capaul e Reto Dietrich proponi ed elegi. Encunter la gliesta da tractandas dat ei neginas objecziuns.

2. Prelecziun ed aprobaziun dil protocol dils 18 da december 2009

Il protocol dalla davosa radunonza communal dils 18 da december 2009 vegn prelegius ed approbaus unanimamein.

3. Plaid d'avertura dil president communal

Sco usitau tier l'emprema radunonza communal digl onn fa nies president in plaid d'avertura. El seregorda da nos defuncts, Mengia Carisch * 09.07.1926 e † 28.01.2009, Arnold Spescha-Carisch * 25.10.1933 e † 14.12.2009, Josef Anton Sac-Beer * 28.04.1923 e † 08.01.2010 e Nesa Sac * 24.05.1931 e † 08.04.2010. Egl onn 2009 ha ei dau sulettamein ina naschientscha, numnadamein Alessia Spescha, *01.03.2009, feglia da Manuela e Christian Spescha-Caviezel.

Plinavon fa president Sievi Sgier fa ina retrospectiva dil curriu e passau il davos onn. El fa menziun dils projects ch'ei sin rucca, sco era dils projects previ pils proxims onns, numnadamein la sanaziun dallas vias da funs e la sanaziun digl aquaduct.

Sco davos engrazia el a tut ils officials da vischnaunca ch'ei s'engaschai e s'engaschan pil beinstar da nossa vischnaunca, sco era a tut ils commembers dallas uniuns dil vitg ed a tuttas vischinas e vischins che s'engaschan en ina moda ni l'otra.

4. Damonda da credit per in niev vehichel communal

Il vehichel communal actual, tip VW Taro, ei vegnius cumpraus igl onn 1994. Dapi lu ha il vehichel prestau dabia uras lavur ed ei egl interval caraus rodund 66'000 km.

Cun fin mars 2010 havess la vischnaunca stuiu mussar avon il vehichel. Ina controlla entras la garascha responsabla ha demussau ch'il vehichel ei buc en in bien stan. Per saver dumignar la controlla digl uffeci da traffic havessen ins stuiu far reparaturas pli grondas ed aschia investir ina considerabla summa. La suprastonza ha sinaquei secussegliau en caussa e concludiu da presentar in project per la cumpra d'in niev vehichel communal. Ella fa la proposta da cumprar in jeep, model Mitsubishi L200. Tenor las offertas avon maun ei da quintar cun ina summa da frs. 35'000.00 per in tal vehichel.

El prezi ei medemamein cumpriu ina punt d'aluminium ed in cundrez per montar il fierasal. Il prezi da brat ei vegnius offerius cun frs. 4'200.00. Pia seresulta la summa d'investiziun netto a frs. 30'800.00.

La suprastonza fa la proposta da conceder il credit necessari ell'altezia da frs. 35'000.00

La radunonza communal fa buca diever dalla discussiun e concluda unanimamein entras tscharna da conceder il credit necessari ell'altezia da frs. 35'000.00.

5. Approbaziun dall'aschunta tier il contract da concessiun denter la vischnaunca d'Andiast e las Ovras electricas Frisal SA per la surdada dall'aua dil Flem allas Pendicularas B-V-A SA

Igl onn 1955 ha la vischnaunca d'Andiast concediu agl "Implont Electric Frisal-Pigniu SA" (oz Ovras electricas Frisal SA) ils sequents dretgs:

- a) retener l'aua dil Flem en in lag d'ulivaziun (Ausgleichsbecken) tier "il Bostg" e da duvrar quell'aua per forza electrica en ina centrala a Tavanasa.
- b) retener l'aua dil Flem ella Val Frisal en in lag d'ulivaziun e da duvrar quell'aua per forza electrica en ina centrala a Breil.

Las Ovras electricas Frisal prevedan danovamein da surdar ina quantidad da quell'aua allas Pendicularas B-V-A SA per far neiv artificia. Cun quei ch'il diever dall'aua per far neiv artificia ei ina midada d'intent dil contract da concessiun existent, ei l'approbaziun da quei supplement tier tal contract da concessiun necessaria. Alla vischnaunca d'Andiast resulta negina sperdita finanziaria. Igl equivalent d'energia dalla quantidad dall'aua duvrada per la produenziun d'energia vegn indemnisada entras las Pendicularas B-V-A SA. La presenta aschunta cuoza tochen tier la scadenza dil contract da concessiun, pia tochen ils 30 da zercladur 2040.

La suprastonza communal fa la proposta dad approbar l'aschunta tier il contract da concessiun.

L'aschunta tier il contract da concessiun denter la vischnaunca d'Andiast e las Ovras electricas Frisal SA vegn approbada unanimamein.

6. Presentaziun ed approvaziun dil quen 2008/09 dil consorzi da scola V/A

Il quen per igl onn da scola 2008/09 siara suenter expensas da frs. 508'608.10 ed entradas ell'altezia da frs. 200'472.20 cun in surpli da cuosts da frs. 308'135.90, il qual vegn repartgiu sin las duas vischnauncas consorzialas tenor il diember da scolars:

- **Cumpart vischnaunca d'Andiast (24 scolars)** frs. **144'735.90**
- Cumpart vischnaunca da Vuorz (27 scolars) frs. 163'400.00

Il quen dil consorzi ei vegnius revedius ils 12 da mars 2010 entras ils revisurs da quen. Il rapport ei vegnius publicaus ensemen cul quen. La suprastonza communal propona alla radunonza communal d'approbar il quen 2008/09.

Il quen 2008/09 dil consorzi da scola e scoletta Vuorz/Andiast vegn approbaus unanimamein.

7. Varia

Deponia Resgia: President communal Sievi Sgier orientescha cuort davart la deponia a Resgia. Ei vegni dismiss leu tut auter ch'ils curdems che s'udessen leu. El sa informar ch'ins vegn a prender a mauns quella problematica, era cun trer neutier ils responsabels digl uffeci cantunal responsabel.

Andiast, ils 16 d'avrel 2010

Il president:

Igl actuar:

Sievi Sgier

Giovanni Damiano